

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj: 7/10), na prijedlog Ministarstva za obrazovanje, nauku, kulturu i sport, Vlada Zeničko-dobojskog kantona na 16. sjednici, održanoj dana 09.07.2015. godine, d o n o s i

ZAKLJUČAK

I.

Prihvata se Mišljenje Ministarstva za obrazovanje, nauku, kulturu i sport, doneseno po Inicijativi poslanika Midhata Delića, broj: 01-02-12172-1/15, od 16.06.2015. godine, koja se odnosi na donošenje Zakona o izmjenama i dopunama Zakona o osnovnoj školi i Zakona o izmjenama i dopunama Zakona o srednjoj školi vezano za ukidanje proljetnog raspusta i čini sastavni dio ovog zaključka.

II.

Zaključak se upućuje u daljnju skupštinsku proceduru.

III.

Zaključak stupa na snagu danom donošenja.

Broj: 02-_____/15.
Datum, 09.07.2015. godine
Zenica

PREMIJER

Miralem Galijašević

DOSTAVLJENO:

1x Ministarstvo za obrazovanje, nauku, kulturu i sport,
1x Stručna služba Skupštine,
1x a/a.

Obrazloženje

Pravni osnov:

Pravni osnov za donošenje ovog zaključka temelji se na članu 16. stav 4., Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj: 7/10), kojim se utvrđuju stavovi o pitanjima od značaja za sprovođenje utvrđene politike, odnosno, određuju zadaci kantonalnih organa uprave.

Razlozi za donošenje:

Na 9., sjednici Skupštine, od 19.05.2015. godine, Predsjedavajućoj Skupštine Kantona, poslanik Midhat Delić, podnio je Inicijativu **broj: 01-02-12172/15.**, vezanu za donošenje Zakona o izmjenama i dopunama Zakona o osnovnoj školi i Zakona o izmjenama i dopunama Zakona o srednjoj školi kojima bi se ukinuo proljetni raspust, resorno ministarstvo je pripremilo posebno Mišljenje-Izjašnjenje iz domena svoje zakonske nadležnosti, a koje je sastavnim dijelom ovog zaključka.

Finansijski pokazatelji:

Realizacijom ovog zaključka neće biti dodatnih zahvatanja u odnosu na planirana sredstva u usvojenom Budžetu Zeničko-dobojskog kantona za 2015. godinu.

Mišljenja smo da postoje opravdani razlozi za donošenje ovakvog zaključka.

U vezi sa aktom Stručne službe Skupštine Kantona, **broj: 01-02-12172/15., od 29.05.2015. godine**, vezane za podnesenu Inicijativu poslanika Midhata Delića a koja se odnosila na donošenje Zakona o izmjenama i dopunama Zakona o osnovnoj školi i Zakona o izmjenama i dopunama Zakona o srednjoj školi kojima bi se ukinuo proljetni raspust, resorno ministarstvo daje sljedeće:

MIŠLJENJE

Uvažavajući mišljenje poslanika Midhata Delića, kao i, vjerujemo, jednog dijela prosvjetnih radnika, da je uvođenje proljetnog raspusta polučilo određene negativnosti koje se ogledaju, između ostalog u otežavanju rada prosvjetnih radnika sa učenicima nakon povratka sa raspusta, da uvezivanje (5) pet dana proljetnog raspusta sa prvomajskim praznicima dovodi do toga da odsustvo učenika sa nastave traje ponekad i do (10) dana i slično, i dalje smo stajališta da proljetni raspust ne treba ukidati.

Naime, proljetni raspust omogućava rasterećenje učenika pred kraj školske godine, zadovoljavanje njegovih osnovnih razvojnih potreba ali i poštivanje Konvencije o pravima djeteta. Ovaj kratki odmor treba se posmatrati kao jedna od potrebnih stepenica za premoštavanje problema učenika nastalih tokom školske godine, a vezani su za uspjeh u učenju i vladanju. Isto tako, to je prilika da se svi učenici adekvatno pripreme za kraj školske godine, za sistematizaciju izučavanog nastavnog gradiva, za planiranje i učenje za zaključne ocjene. To je vrijeme kada i nastavnici mogu da na jedan objektivna način sagledaju protekli period i učine dodatni napor kako bi pronašli najprimjereniju strategiju za unapređenje svoga rada, a sve u cilju poboljšanja ukupnog uspjeha učenika u učenju i vladanju na kraju školske godine.

Također, Kantonalni odbor Sindikata osnovnog obrazovanja i odgoja i Sindikata srednjeg i visokog obrazovanja Zeničko-dobojskog kantona, aktom **broj: 78-06/15 od 15.06.2015. godine, (vidjeti u priložu)**, izjasnio se da je stav njihovog članstva **da proljetni raspust ne treba ukidati, jer je uvođenje proljetnog raspusta polučilo izuzetno dobre rezultate i za učenike i za nastavnike, bez bilo kakvih loših implikacija u aktualnoj obrazovnoj praksi na području Kantona.**

Stoga, a imajući u vidu naprijed navedeno činjenično-pravno stanje, a uvažavajući stajališta naših socijalnih partnera po ovim bitnim pitanjima, kao i dostignuti nivo reformskih promjena u našem obrazovnom sistemu, u ovom trenutku, mišljenja smo da podnesena inicijativa uvaženog poslanika ne bi polučila poboljšanja u aktuelnoj obrazovnoj praksi.

S poštovanjem,

MINISTAR

Broj: 10-02-12172-1/15.
Zenica, 16.06.2015. godine,

Mensur Sinanović

Dostavljeno:
1x Stručna služba Vlade
2x a/a-01/02.



Broj: 01- 02-12 172 /15
Zenica, 29.05.2015. godine

- VLADA ZENIČKO-DOBOJSKOG KANTONA, n/r sekretara
- ZAKONODAVNO-PRAVNA KOMISIJA SKUPŠTINE, n/r predsjedavajućeg

PREDMET: Inicijativa za donošenje Zakona o izmjenama zakona o osnovnoj školi i Zakona o izmjenama zakona o srednjoj školi-dostavlja se,

Midhat Delić, poslanik u Skupštini Zeničko-dobojskog kantona pokrenuo je na 9. sjednici Skupštine Zeničko-dobojskog kantona održanoj 19.05.2015. godine, u okviru predtačke dvenog reda: „Postavljanje poslaničkih pitanja i pokretanje inicijativa“, **Inicijativu za donošenje Zakona o izmjenama zakona o osnovnoj školi i Zakona o izmjenama zakona o srednjoj školi u dijelu koji se odnosi na odmor (raspust) učenika u toku školske godine, te izbor direktora u srednjoj školi.**

S tim u vezi, u skladu sa članom 112. stav 1. Poslovnika Skupštine Zeničko-dobojskog kantona, u prilogu vam dostavljam na mišljenje predmetnu inicijativu o kojoj ste se dužni izjasniti u roku od **30 dana**, radi daljeg postupanja Skupštine po istoj u skladu s Poslovnikom Skupštine.

S poštovanjem!



Prilozi: dio transkripta sa 9. sjednice Skupštine u kome je sadržana inicijativa poslanika Delića i inicijativa predata u pismenoj formi

Dostavljeno:

- 1x Naslovu
- 1x Ministarstvu za obrazovanje, nauku, kulturu i sport ZDK
- 1x Poslanicima Skupštine
- 1x U predmet – „R“/03

MIDHAT DELIĆ

A sada razlog mog 5javljanja jeste jedna poslanička inicijativa, odnosi se na to da se, da Vlada znači u odgovarajućem roku pripremi i u skupštinsku proceduru uputi prijedlog odnosno Zakon o izmjenama Zakona o osnovnoj školi i Zakona o srednjoj školi, u dijelu koji se odnosi na tzv. proljetni raspust učenika u toku školske godine, te izbora direktora u srednjoj školi.

Kratko obrazloženje:

S obzirom da je friško dakle, nedavno se to desilo, Zakonom o i zmjenama i dopunama Zakona o osnovnoj školi i o srednjoj školi koji su objavljeni u Službenim novinama kantona, broj: 9/11 predviđen je proljetni odmor za učenike u trajanju od jedne sedmice odnosno 5 radnih dana koji se koristi u mjesecu aprilu zadnjih 5 dana. Tokom četiri posljednje školske godine koliko je ovaj zakon bio na snazi uvidjele su se određene negativnosti koje su proistekle njegovom primjenom, a naročito se ogledaju u sljedećem:

1. Nakon završenog raspusta potrebno je najmanje dvije do tri sedmice kako bi se učenici vratili u uobičajene aktivnosti odgojno obrazovnog proces i to pred sam finalni dio tog procesa, jer zbog prvomajskih praznika sa kojima se ovaj proljetni raspust spoji on ustvari umjesto 5 dana najčešće potraje 11 dana.
2. Drugi razlog što je potrebno dosta vremena za ponavljanje nastavnih sadržaja kako bi se nastavni proces koji se naslanja na ranije usvojena znanja mogao dalje kvalitetno nastaviti.
3. Što bi učenici završnih razreda odnosno maturanti završili svoje redovno školovanje prije prvomajskih praznika i ne bi morali pohađati jedan ili dva eventualno tri dana iza prvomajskih praznika, a samim tim bi i ranije mogli pristupiti polaganju završnog ispita, te na taj način blagovremeno aplicirati na konkurse visokoškolskih ustanova na kojima namjeravaju nastaviti svoje školovanje.
4. Ovih 5 radnih dana koji su predviđeni za ovaj odmor mogli bi se iskoristiti na jedan od sljedeća dva načina, i to:
 1. Da se za tih 5 radnih dana produži trajanje zimskog odmora ili raspusta čime bi se postigle dvije stvari: Smanjio bi se veliki problem koji se javlja u ovom periodu u mnogim osnovnim školama, a odnosi se na nedostatak goriva odnosno, ogreva za zagrijavanja školskih prostorija i to obično u vremenu kada su dani i najhladniji tj. koncem januara i kada mnoge škole zbog tog problema skraćuju trajanje nastavnog procesa, a neke ga potpuno obustave, ove godine je to ponaročito bilo evidentno u mnogim i zeničkim i kakanjskim osnovnim školama po mojim sazanjima. Osim toga boravak učenika koji žive u sredinama gdje je zrak zagađen, osim toga fala Bogu toga nam i ne manjka, jel' na planinama ili negdje gdje je ta zagađenost smanjena mogao bi se produžiti za tih 5 dana jer se zna da je zagađenost zraka upravo najveća u tom vremenskom periodu, a i rizik za različita oboljenja kod naših najmlađih je tada i najveći.
 2. Ili ukoliko to ne bude moguće dakle, da se tih 5 radnih dana iskoristi pa da se ranije završi nastava, odnosno nastavna školska godina čime bi se izbjeglo izvođenje nastave za vrijeme trajanja velikih vrućina koje znatno otežavaju, a nekada skoro pa i onemogućavaju realizaciju finalnog dijela nastavnog procesa, pogotovo u školskim objektima koji su montažnog tipa ili su lošije kvalitete.

U prilogu ove moje inicijative ja sam i napisao kako bi to trebalo otprilike da izgleda i želim samo još jedanput da zamolim nadležno ministarstvo dakle, kada se bude očitovalo o ovome da razmisli o svemu ovome i nadam se da će donijeti pozitivno mišljenje vezano za ovu moju inicijativu, pogotovo nakon što je jedan određeni dio nastavnika koji su bili angažovani u nastavi i koji su se otprilike protivili ovoj inicijativi jer su taj raspust smatrali i svojim raspustom, nakon što je ministar odnedavno, novi ministar dakle, s pravom naredio nastavnicima da rade te radne dane, sada ni oni *praktično nisu više protiv ovakve jedne inicijative, zahvaljujem na ukazanom....*



Na osnovu člana 111. Poslovnika Skupštine Zeničko-dobojskog kantona-novi prečišćeni tekst („Službene novine Zeničko-dobojskog kantona“, broj 7/12),, Skupštini Zeničko-dobojskog kantona podnosim sljedeću

INICIJATIVU

Da Vlada Zeničko-dobojskog kantona u odgovarajućem roku, pripremi i u skupštinsku proceduru uputi Zakon o izmjenama Zakona o osnovnoj školi i Zakon o izmjenama Zakona o srednjoj školi u dijelu koji se odnosi na odmor (raspust) učenika u toku školske godine, te izbor direktora u srednjoj školi.

OBRAZLOŽENJE :

Zakonom o izmjenama i dopunama Zakona o osnovnoj školi („Službene novine Zeničko-dobojskog kantona“, broj 9/11) i Zakonom o izmjenama i dopunama Zakona o Srednjoj školi („Službene novine Zeničko-dobojskog kantona“, broj 9/11) predviđen je proljetni odmor za učenike koji traje jednu sedmicu a koji se koristi posljednjih pet radnih dana u mjesecu aprilu.

Tokom 4 posljednje školske godine koliko je ovaj Zakon bio na snazi uvidjele su se određene negativnosti proistekle primjenom odredbi Zakona vezanih za proljetni odmor učenika, koje se ogledaju u sljedećem:

1)Potrebne su najmanje dvije do tri sedmice nakon okončanja odmora kako bi se učenici vratili u uobičajene aktivnosti odgojno-obrazovnog procesa i to pred sami finalni dio toga procesa, jer zbog prvomajskih praznika sa kojima se spoji ovaj odmor umjesto 5 dana najčešće traje 11 dana.

2)Potrebno je dosta vremena za ponavljanje određenih nastavnih sadržaja kako bi se nastavni proces, koji se naslanja na ranije usvojena znanja, nakon proljetnog odmora mogao dalje kvalitetno nastaviti.

3)Učenici završnih razreda (maturanti) ne bi morali pohađati nastavu još dva ili tri dana nakon ovoga raspusta jer bi svoje školovanje završili prije prvomajskih praznika.Time bi im bilo omogućeno ranije pristupanje polaganju završnog ispita(u skladu sa odredbama Pravilnika koji to reguliše) kao i blagovremeno podnošenje aplikacija na konkurse visokoškolskih ustanova na kojima namjeravaju nastaviti školovanje.

4)Ovih pet radnih dana predviđenih za ovaj odmor bi mogli biti iskorišteni na dva načina i to:
a) za produženje trajanja zimskoga odmora za ovih pet dana čime bi se postiglo:

-Smanjenje velikih problema koji se javljaju u ovom periodu u mnogim osnovnim školama a vezani su za nedostatak ogreva za zagrijavanje prostorija i to obično kada su dani i najhladniji i kada mnoge škole zbog toga skraćuju trajanje nastavnog procesa a neke ga potpuno obustave.

-Boravak učenika (koji žive u sredinama gdje je zrak zagađen) na planinama ili negdje gdje je ta zagađenost smanjena bi mogao biti produžen za pet dana, a zna se da je zagađenost zraka upravo u tim danima najveća a i rizik za različita oboljenja kod naših najmlađih je tada najveći.

b) za raniji završetak nastave za učenike za ovih pet dana , čime bi se izbjeglo izvođenje nastave za vrijeme trajanja velikih vrućina koje znatno otežavaju a nekad skoro pa i onemogućavaju realizaciju finalnog dijela nastavnog procesa, pogotovo u školskim objektima koji su montažnog tipa ili su lošije kvalitete.

Zakon o izmjenama i dopunama Zakona o osnovnoj školi

Član (1)

U članu 31., stavovi 1. i 2. Zakona o osnovnoj školi („Službene novine Zeničko-dobojskog kantona“, broj: 5/04, 20/07 i 9/11), mijenjaju se i glase:

Varijanta a)

„Zimski odmor za učenike osnovne škole traje četiri sedmice, a ljetni odmor od završetka nastavne godine do početka nove školske godine.

Zimski odmor koristi se nakon završetka prvog polugodišta.“

Varijanta b)

„Zimski odmor za učenike osnovne škole traje tri sedmice, a ljetni odmor od završetka nastavne godine do početka nove školske godine.

Zimski odmor koristi se nakon završetka prvog polugodišta.“

Član (2)

Zakon stupa na snagu narednog dana od dana objavljivanja u „Službenim novinama Zeničko-dobojskog kantona“.

Zakon o izmjenama i dopunama Zakona o srednjoj školi

Član (1)

U članu 30., stav 6. , Zakona o srednjoj školi („Službene novine Zeničko-dobojskog kantona“, broj: 5/04, 20/07, 19/09, 9/11 i 4/14), mijenja se i glasi:

Varijanta a)

„Zimski odmor za učenike srednje škole traje četiri sedmice nakon završetka prvog polugodišta, a ljetni odmor traje od završetka nastavne godine do početka naredne školske godine.“

Varijanta b)

„Zimski odmor za učenike srednje škole traje tri sedmice nakon završetka prvog polugodišta, a ljetni odmor traje od završetka nastavne godine do početka naredne školske godine.“

Član (2)

U članu 131. iza stava 3. dodaje se stav 4. koji glasi: „Odredbe prethodnog stava odnose se i na srednje škole koje su za vrijeme trajanja jednog od ta dva uzastopna mandata promijenile svoj status.“

Dosadašnji stav 4. , postaje stav 5.

Član (3)

Zakon stupa na snagu narednog dana od dana objavljivanja u „Službenim novinama Zeničko-dobojskog kantona“.